

四庫全書

集部

欽定四庫全書

集部

敬業堂詩集卷二十九

詳校官左中允_臣瑋五珠

助教_臣常循覆勘

總校官庶吉士_臣倉聖脉

校對官中書_臣雷純

謄錄監生_臣蔣厚傳

欽定四庫全書

敬業堂詩集卷二十九

翰林院編修查慎行撰

赴召集

起壬午十月
終癸未五月

赴召紀

恩詩

并序

欽惟我

皇上聖德神功遠邁千古薄海內外含生戴性之倫無

一民不被仁恩無一物不沾麗澤巍巍蕩蕩謳頌
難名屬者黃河底績

鑾輅南巡警蹕無聞輕裘減從貿載不遷夫市肆畊犁
不輟乎農郊回陽春於青霜白雪之辰駐宿衛於
節屋茅簷之下無非勤求邛理念切民依臣東海
鰥生偶客畿輔竊聞

駕泣德州方與田夫野老抃舞歡欣共効昇平之頌乃
今十月十七日直隸巡撫李光地傳

旨召臣趨赴行在臣即於臣子克建東鹿縣署中星馳
就道匍伏宮門伏念臣韶齡失學壯歲居貧年逾
四十始舉於鄉三上禮闈未成一第自惟賦命蹇
鈍寸進無階幸逢

堯舜之君自甘猷畝之樂不知微賤姓名何由上達聞
命之下慙慙徊徨罔知所措敬賦紀

恩詩二章恭呈

御覽可勝惶悚之至

聖謨平土奏安瀾

詔舉時巡萬國歡
柵鼓無聲傳過輦
場功初畢候鳴鑾
恩波先沛三春雨
瑞雪都忘十月寒
微賤不知天上事
謳歌遙向彩雲端

睿藻紛縟布九垓
麗天雲漢竝昭回

是日頒賜山東大小臣僚御書數

十幅觀光豈獨臣鄰喜
就日爭隨父老來
作息自安歌帝力
旁求何幸及凡材
祇應

聖主同元化
雨露沾濡到草萊

二十日

召赴行宮

欽賜御書程子視箴一幅恭紀十六韻

警蹕除黃道周廬列紫垣勤民同舜禹邁德媲羲軒戶
戶安淳俗人人覲

至尊萬幾多暇豫八法自騰騫龍鳳爭跳蕩虹霓互吐
吞祥光昭法象健體協乾元揮霍風雲勢涵濡雨露痕
堯文紛煥采宓畫久窮源徧渥奎章賜仍傳

詔旨溫頌來皆琬琰捧出盡瑤琨下逮慙孤梗殊榮荷
九閭瞻天初見日學古莫窺藩箴守儒家說書驚
御筆援祇承雖往訓敬凜即

王言拜舞隨寮寮珍藏示子孫傳家何以報世世頌
君恩

二十八日

召試南書房

自此奉
旨每日入直

屢下南宮第俄聞秘閣開一經雖舊習六論本非材
宋時

秘閣試
六論

不敢他途進終慙

特召來平生無夢想今日到蓬萊

與揆愷功學士同試南書房感舊成句

天上青雲客人間白雪翁交新

雙闕下話舊十年中詩讓揮毫速文慙起草工

宋時秘閣試論

至蘇子瞻
始起草

薦賢名偶玷慙愧躡追風

是日

召試十二
欽定愷功第

一余
第二

南書房敬觀

宸翰恭紀有序

康熙四十一年十一月初八日

上御乾清宮發

御書一千四百二十七幅命大學士

臣張玉書吏部尚

書

臣陳廷敬工部尚書臣王鴻緒副都御史

臣勵

杜訥右諭德

臣查昇展閱分類以備

頒賜臣慎行亦得隨諸臣後仰瞻

天日之光洵有生之奇遇人世所罕覲者也欽惟我

皇上天寬聖姿日新盛德法乾行之健殫

聖學之勤業懋功純光華炳耀深宮無逸游藝入神自
真書以及行草由小楷以至擘窠或臨倣諸家或
親書

聖製有美畢萃無體不兼此雖古來專工八法終身矻
矻自名一家未有如是之多而且精者而臣於拜
觀

宸翰之下仰見我

皇上神功聖德冠絕千古者更有蠡測焉伏讀

御製北征凱旋諸詩廟謨獨斷勝算萬全首惡伏辜餘
寬祝網闢版圖未闢之地臣史策未臣之邦我

皇上宏猷偉畧冠絕千古者其一也伏讀

御製巡視河工省方問俗諸詩奠九有以救寧恐匹夫
之不獲萬姓已共安於耕鑿

一人恒自處於先勞遂致湖海安流黃淮底績我

皇上仁民阜物冠絕千古者又其一也伏覩

御書大學聖經一章旁至往詰先賢格言銘序抉其精
微摘其奧義采諸儒之懿訓成昭代之典謨獨於
程朱二子則不書其名我

皇上崇儒重道冠絕千古者又其一也伏觀

御書於晉魏六朝以逮唐宋元明諸臣名蹟無不手撫
心賞要皆棄所短而取所長集古今之大成為帝
書之第一而紙尾必署云臨某某書我

皇上聖不自聖冠絕千古者又其一也臣一介微賤遭

逢盛事千載一時舞蹈謳吟自不能已譬諸秋蟲
春鳥生覆載之內亦知鳴天地之恩恭賦七言絕
句十二章以紀榮遇謹拜手稽首以獻

玉檢初開五色煙淋漓元氣滿中天

宵衣旰食無多暇更洒雲藍十萬牋

咫尺丹霞映玉清觚稜日射八窗明忽聞風雨來天半
知是

君王落筆聲

一畫真成萬世師捧來千幅更神奇銀河直與

宸居接無數蛟龍起墨池

金薤銀鉤結構新爭看入聖又超神即論藻采輝煌色
萬古羣推第一人

璧合珠連琰琬垂蟲應難測管難窺欲知伐叛安民畧
看取親書

御製詩

遠自鍾王溯褚虞百家一一手臨撫兼長迥出專家上

要令諸臣奉楷模

霞蔚雲蒸露未乾盡收造化入毫端萬鈞腕力皆天授
欲補虞戈一筆難

良工巧匠日礪磨

淵鑒新鐫勝永和不似當年淳化閣帝王法帖本無多
朝退香煙護

紫宸御床綳帙展佳辰綠雲新斲松花硯特撤文房

賜老臣

書訣原從主敬來數行

御札日星開可知筆正由心正入直多聆

聖訓回

鳳翥鸞翔勢莫攀

皇恩次第及千官

九重日月無私照有目皆容仰面看

禁庭纔到便沾榮深愧無才答

聖明強作蕪詞比謠諺

堯文魏煥本難名

冬雪十二韻

朔候連三白同雲匝萬家縱橫迷地軸灝汗極天涯樓閣高逾見簾櫳薄易遮漸從疎處密忽向整時斜老柳飛揚絮枯梅頃刻花氣沉千里雁寒噤幾村鴉暗掃遺蝗種潛滋宿麥芽逢年先應瑞是玉必無瑕積厚光搖海平鋪勢展沙歲功資醞釀春事踵繁華灞上吟情遠山陰客棹賒意中餘好景留作畫圖誇

為泗州李蒼存題秋穫圖二首

築屋不羨蕭貫之種松莫學杜子師西風吹熟半黃稻
又是牛健鴉嬌時

淮南第一山邊住

泗州南山米芾以
為淮山第一山

渦口十年長苦饑

家書昨日報秋穫勸爾有田胡不歸

奉題大司寇新城公荷耒圖

君臣際會唐與虞文章政事誰不如東家司寇魯大儒
品望獨與經術俱晝日三接寵賚殊城南甲第輝

御書帶經堂顏公手摹復以繪畫煩鴻臚

禹之鼎

眼前浩

蕩生江湖歸夢曉落扶桑隅齊州九點青模糊萬木陰
陰猿鳥呼春山欲雨雲作膚風帆亂走隨鷗鳬村深岸
轉帶渚蒲綠楊如煙際平蕪中有一翁行荷耜我公豈
是山澤臞神仙標格蒼眉須朝衫野服兩弗拘良田二
頃宅一區人生此境何可無虞廷當時少此圖盛事缺

載臯陶謨

蠶尾山圖再為新城先生賦三首

依然小泊洞庭旁，公自扁舟興不忘。
試向東山看月出，繞身三十里湖光。

勿論石室與金庭，畫裏迴源別有亭。
七十二峯遮不斷

遙添蠶尾一痕青

曾見趙松雪惜華秋色圖
蠶尾一峯青出羣山之外

千秋讎籍記東平，天寶詩人舊有名。
從此人間長見畫，故鄉山水屬先生。

送楊旣明倅廬州兼寄張建陽太守

薊北冰霜動早梅，淮南驛騎已先催。
春帆路轉藏舟浦

堦館花迎教弩臺名郡風流輸半刺世家子弟羨多才
桑枝麥穗君游政何術能資佐理來

擬玉泉山大閱二十韻

地闢丹稜汧天開裂帛湖連岡環北極列曜拱中區鞬
譯銷氛氣風雲蓄

睿謨不忘神武畧獨握帝王符吉日將差馬先期已祭
驅桓桓齊步伐肅肅選車徒野曠金鉦轉沙平玉帳鋪
一人躬韎韜九校勇馳驅鵠鶴知兵法龍蛇入陣圖雪

光明組練寒律勁雕弧憶昨三犂候

親征萬里逾行間走英衛麾下拔孫吳捷伐聲靈在韜
鈴將相俱詩人虜虎拜士氣動山呼振旅時方暇回
鑾日未晡殊威宣邈土同軌坦經涂典禮因時舉櫓槍
掃跡無武功雖再纘文德久覃敷用邊昭無外周防戒
不虞煌煌太平業磐石鞏

皇都

盆中二咏吳元朗齋分賦

一尺勞蕙種低抽碧玉簪近人差免俗待汝幾成林不

少交加翠終輸瑣碎金若為鞭橫逸移向小庭陰

細竹

不隨千樹暗

東坡梅花詩江頭千樹春欲暗

只似一枝斜愛入詩人閣

難忘處士家帶苔移客土傍火發唐花就我生春色依

依感歲華

早梅

賦得歲寒堅後凋

十二月十五日 御試入直詞臣奉 旨同作不用應制

體

物性終難改天行歲有常平時滋雨露晚節煉冰霜鶴

骨清添勁龍鱗老，變剛鬱葱生意在。寒律總春陽。

集汪東川祭酒齋賦得風潮泊島濱即次祭酒

原韻

淼淼停征櫂，茫茫失遠汀。雲隨風脚黑，天偪浪頭青。碧石驚難定，影沙駭未經。直疑蜃氣化，孤島似浮萍。

奉和

聖製咏雁恭次原韻

立春後一日

不戀江湖濶，仍為北嚮鴻。羽毛知自愛，一一待春風。

恭和

御製為考試數原韻

十二月二十三日考試
各省學臣奉 旨同作

聖主嚴科詔

御製詩為
科場作

深期積習更憐才程玉律肇昌俗

發鐘聲既往應知悔將來勿任情欽哉奉

明命勉矣立修名

早春喜雪

二十六日應
皇太子令

同雲迴合曙光中恰喜占年兆歲豐三白連縣餞殘臘
六花翔舞向東風暎空有色高逾見到地無痕暖漸融

好借渡江梅柳意亟裁詩句報春工

彤庭雪霽

二十七日應
皇太子令

曠曠霽色啓黃扉瑞靄遙生旭日暉白玉堦墀增皎潔
丹霄臺殿倍光輝融成雨露滋仙境化作陽和滿

帝畿共喜太平真有象宮梅苑柳漸芳菲

雪後與楊崇木編修步入後左門

淨洗東華十丈塵曉來聯袂句

楓宸誰憐舊日聞鷄伴又作殘年踏鼓人

除夕前一日晚出東華門口占示錢亮功

未許騎官馬誰能借蹇驢人憐三黜後自歎二毛初曉
入蛩兼駮昏歸步當車崢嶸冰雪裏草草歲將除

京師與德尹守歲用少陵飛騰暮景斜句為韻
各賦古詩五首

勞薪無停輪弱羽宜退飛與子各衰晚初心尚依依川
流日夜東造化一逝機去者既不返來者終安歸百年
幾寒暑一夕母相違

庭除帶積雪門巷餘殘冰雪後冰尚堅寒光互稜層照
我頭上髮射我窗上燈我醉雨不知流光兀騰騰桑榆
有餘暖忍凍非汝能

寥寥夜向晨冉冉歲云暮豈無一樽酒惜此佳節度雕
盤釘肥烹彼嗜非余慕餅罍貯旨蓄義取咄嗟具天明
有朝叅飽啖黃蘗去

壯歲輕別離東西浪驅騁迴思疇昔事過眼須臾景
明詔歛見微浮蹤合萍梗半生參與商此夕形隨影再

拜感

君恩官似居鄉井

兒孫在畿縣兄弟居京華計里五百餘相望如袞斜一
門盡旅食老境終思家此時山中梅苔枝應已花吾方
作歸夢街鼓幸緩撾

癸未元日

乾清宮早朝

三陽景運翊佳辰紫極傳來

詔旨新雙闕倚天晴帶雪千門銜日曉除塵金爐香引
朝元路銀燭光分待漏人親見堯蓂初吐葉

龍飛四十二年春

朝會樂器歌

康熙四十二年正月初二日入直
南書房蒙 恩賜觀樂器編蕭一

鼓二鐘一黃麾一壎一篪
一祝一敔一退朝恭紀以詩

雲門咸池及大章制作肇自炎興黃後來韶夏繼漢武
聲容綴兆遙相望或云象功或象德宮懸一一傳太常
洎乎秦漢寢失古器雖尚在意渺茫儒生好事強傳會

蒼龍朱鷺妄揣量流傳往往入樂府遂薦郊廟登明堂
豈知元音關運數出與盛世鳴光昌

國家功崇德深厚上有

堯舜垂衣裳八風從律星應紀亭毒四序昭三光

一人穆穆慶交泰多士濟濟歌元良朝乾夕惕日不足

庭燎繼問夜未央肅雝臨保本家法儼觀列聖於羹牆
化成久道治累洽民返太朴仁風翔懷柔河岳指帶礪
撫馭畿甸巡遐荒北清狼望罷斥堠南拓鰲背開封疆

圓顱方趾悉受吏丹矚白雉爭來王麒麟在郊鳳巢閣
不貴異物夸禎祥太和之氣彌宇宙正賴雅樂為宣揚
吾

君神智況天縱

聖學孰測淵源長精通緯數窮亥步博極典墳追羲皇
黃鐘累黍辨清濁太簇截竹調陰陽文成雲璈扣金石
詩就月窟諧宮商伶官却立衆工伏

御製親授協律郎豈惟神人胥悅豫兼采法曲收遺忘

每逢

朝賀必合樂左右羅列東西廂臣昨承

恩預元會摠衣肅拜丹墀旁拓黃帕瞻黼座近咫尺顙
首心徬徨廣庭雪花開蕙蕤采殿日氣暎搏桑乍聞鈞
天動九奏縹緲散入爐煙香始終條理何暇晰但覺盈
耳聲洋洋歸來愴恍疑夢寐魯壁一夜聆鏗鏘明朝

詔許觀古器始信大樂非絲篴編鐘編磬列蕤簾楹鼓
田鼓齊輝煌旌麾奇綵繪螭虎簫管逸韻含鸞凰塤箎

祝啟狀各異据圖考證殊難詳天生耳目不虛界

帝錫聞見開聾盲虞廷當日傳搏拊鳥獸應節猶低昂
幸逢昌期邀異數及與百爾偕趨蹌歡心不覺同率舞
拜手敢謂希賡颺矢詩遂歌記盛事

萬年願奉南山觴

恩賜砥石山綠硯恭紀十韻

扁石登

廊廟良工費網羅出應逢

盛際名始著
岩阿養璞埋雲霧
呈材仰琢磨
潤流花上露
青刷雨中荷
眉子殊難匹
陶泓詎足多
祇宜供

玉案敢望

賜鑾坡染翰

恩長被含毫分已過
拜嘉誠異數
榮捧竝詞科
彩筆濡
雙管
喻糜試一螺
便應焚舊硯
涓滴浥餘波

初四日雪中隨

駕赴西苑夜宿自怡園賦呈揆愷功院長二首

出城三十里飛鞚不曾停萬樹忽凝素一峯猶翠屏渡
橋欄宛轉漱石水清冷共識

皇情豫新畬二麥青

獵獵風欹帽颼颼雪點衣林塘迷野徑燈火候郊扉東

閣新詩好梁園舊客非

謂西溟
東江

白頭憐我在至性似君

稀

雪後與聲山紫滄同直

暢春園二首

西山帶雪高寒光際青天晨曦照積素萬木中含煙手
把右丞詩羣峰當我前幸無塵事擾兼以忘新年

宛宛紫界墻苑門開向東

直廬在小東門內

官然深山意近在

十步中林鳥已春聲細泉生遠風澄懷適有會咏嘯何
必同

上元前三日自怡園觀燈上相國兼呈院長二
首

碧香新試上元筭

詔許名園續舊遊
下直一行同繫馬
入門幾步便移舟
宮中詩句元才子
天下神仙李鄴侯
兩世

恩光皆眼見
得陪賓從也風流

二分明月一分燈
引入仙山第幾層
洞口煙霞濃似染
雪邊亭榭暖如蒸
林疎竹密參差見
逕轉廊迴取次登
却向江湖回白首
十年重到夢何曾

自癸酉以後
不到十年矣

連日賜

御饌恭紀

不識

天厨味頻驚出大官調和從翠釜珍重對金盤腹儉捫
應愧

恩深報漸難翻防饑朔笑待詔得加餐

十四十五夜

召入西苑賜觀煙火恭紀七言絕句八首

閣道中分十里墻西山西繞

御園長夕陽消盡千峯雪別吐紅雲捧

玉皇

不夜城邊宛轉通
廣場千步望玲瓏
欲知九曲黃河勢
只在仙人一掌中

宮鴉飛盡暮天青
百萬燈如百萬星
併作晶瑩光一片
忽從銀海湧松亭

火齊珊瑚竝陸離
山光林影互參差
靜無人語來天上
微覺風搖五綵旗

布置高低儼列壙
朦朧初被白雲封
流星一綫飛空去

匝地漫天盡燭龍

孟浩然蘭門觀燈詩
蘭門看火樹疑是燭龍然

百道金蛇閃苑城須臾萬鼓助砰輶誤疑雷電前山起

勤政樓頭月正明

綵棚高架起鰲山銀燭光騰霄漢間寧壽宮中扶輦出

太平

天子奉

慈顏

虬箭聲遲玉漏中年年行樂與民同詞臣好紀昇平事

簫鼓連宵報歲豐

恭祝

萬壽詩十二章

有序

竊聞純禧永錫篤生有道聖人景命長新弘啓無
疆歷服詩歌嘉樂先推之保佑天申書衍疇圖必
極諸康寧壽考既誕膺夫繁祉自久享夫歷年欽
惟

皇上體天行健如日之升質文持五運之中道法冠百

王之上嘉祥咸萃統元會而保合太和

尊號弗居屏顯榮而敦崇實政推虞帝協中之化欽恤
何啻再三師夏王補助之仁蠲賑動盈千萬澤流
漳滏則畿輔安瀾功奠淮黃則東南底績舉曠典
於時巡時邁播鴻慈於養老養賢凡茲德意之覃
敷悉本精神之強固歲惟協洽日在降婁欣逢

聖壽之期適符大衍之數於時和風翔洽化日舒長騎

竹兒童識

天顏於過輦扶鳩白叟瞻佳氣於

回鑾由勲舊以逮懿親自文臣以及武衛獻三多之祝

稱

萬歲之觴莫不慶溢山呼歡騰虎拜臣慎行草莽陋質

僻左孤踪遭遇

聖明召依禁近臣之蒙

恩拔擢視多士為獨優臣之感

德頌颺較羣工為倍切用敢不辭媿鄙敬托謳吟葵知

向日冀俯鑒夫寸心冀幸生階思仰酬夫大造云

爾

瑞靄凝

丹陛祥煙擁

紫宸

萬年三月節四海一家春禮樂調元化謳歌屬

聖人敷天多望幸特為舉時巡

其一

睿慮周遐邇

皇猷冠古今堯階三尺土舜樂五絃琴德自重熙洽

恩沾壽考深萬方均樂育帝謂本無心

其二

見說山東叟欣觀德化成蠲租憐歲儉賜粟惠春畊不
息

天行健無私

帝好生活人餘百萬軫卹荷

皇情

其三

翠岫三千丈崔巍上岱宗金泥除漢策玉檢陋秦封旗

拂天門樹雲開日觀峰
仙山留五老擁蓋侯

飛龍

其四

鑾輿親閱視河水正平隄
西受清淮弱東趨滄海低
一條鋪練帶千里亘虹霓
永紀隨刊績朝宗萬國齊

其五

川岳懷柔日乾坤奠麗中
安流歸

聖算平土奏神功
桑柘連村遠來牟入望同
不教傳

警蹕到處聽呼嵩

其六

一覽江天濶長流

聖澤深晴霞開海面
燭火照波心御墨蛟龍勢
仙韶鸞鶴音扶桑占喜氣
來往快登臨其七

春水江南路

巡遊紀昔年觀風來海嶠
問俗上吳船淳朴安畊鑿
繁

華輟管絃

天顏知有喜康阜勝從前其八

千頃頗黎色重為

明聖開

宸章懸日月

睿藻煥亭臺桃李乘時放煙波拂櫂來湖山真有幸直

作小蓬萊

其九

秦淮民望切歸路又重經二水春流碧三山爽氣青香
煙迎不斷

翠輦過還停愛戴心如一爭看

萬壽屏

其十

宵旰勤三事清廉勉六曹與民同後樂為政必先勞

優詔辭尊號

回鑾沛雨膏

先一日大赦

巍巍功德在峻極孰爭高

其一

地久天長運河清海晏期九如爭獻頌三祝並摛詞謏

陋叨

殊遇顙愚仰

聖慈自慙同小草依托

上林枝

其二

新荷

西苑作

幾處葉田田池塘未吐蓮托根來

上苑濯質自清泉扇拂煙波動珠承雨露圓魚知游泳
樂爭聚畫橋邊

三月二十六日分賜

南書房入直諸臣瓶中牡丹臣慎行得鞋紅一朶恭紀
扶桑初旭映瞳矐聯步晨趨入直同

紫闥恩光連上苑

彤廷芳氣襲東風人來漢殿鶯花候春在

堯天雨露中五色雲端親捧出仙葩爭看一枝紅

四月初四日

殿廷對策恭紀

朱衣前引句

彤庭黃紙封頒出

御屏仗外煙霞成化雨

是日午後微雨

螭坳燈燭聚春星天人

理要窮三策章句儒多守一經不是

皇仁均造物搏扶容易徙南溟

初七日

太和殿傳臚恭紀

九霄臺閣九重城臚唱親聽第四聲

余名在二甲第二

自比蓬

麻資灌植羣欣燕雀荷生成雲開閭闔趨冠珮風過江

湖識姓名

宋劉季孫詩日出唱君名姓春風吹過江湖

從此酬

知須努力勉承鞭策赴王程

初九日

恩榮宴恭紀

竊祿官厨已半年

余自去年十月奉召入內廷

紅綾重對曲江筵生

逢

聖代誠何幸老傍科名又自憐杏葉

鞍名

杏園同駐馬雁

行雁塢總隨肩綠槐樹底參差影猶記花黃六月天

禮部

廳事前槐陰特茂諸進士宴席分列其下

恭和

御製初夏新晴較射

淑氣迎新夏

華駒出曉晴隔花初樹鵲穿葉不驚鶯月滿開弓勢風
高應羽聲誰知

聖人意耀德本無爭

十五日

保和殿引見

欽授翰林院庶吉士恭紀

蛾眉班押候

臨軒未有涓埃報

至尊特許奏名來玉陛不教待詔老金門文章報國懸

臣分官牒同朝戴主恩

臣胞弟嗣琛翰林院編修族姪昇左春坊左諭德

葵藿

有心知向日願從瑤島結孤根

十九日

午門賜鈔恭紀

頻垂旅橐走關山一第俄登蓬閣間遂有朱提分

少府頓令寒士動歡顏

宸章舊沐華縑重

去年在德州蒙賜御書程子視箴

寶硯曾叨綠玉頒

今年正月蒙賜
砥石山綠硯

今日衆中還拜

賜殊榮稠疊冠清班

二十日

文廟釋褐恭紀

數仞宮牆霄漢連兩楹俎豆故依然曾陪鼓篋三千士

重到橋門二十年

余自甲子五月
入國學肄業

末學豈增科目重非

才特荷

聖人憐較他儕輩蒙

恩早獨在青衫未換前

二十一日赴

暢春苑謝

恩恭紀

初著宮袍拜

禁林碧梧翠柳望成陰可知

聖主栽培意即是天工長養心
千頃池邊看鼓鬣萬年
枝畔聽鳴禽從來日月無私照
一物含光感自深

送高江村先生南歸即次紀

恩六章原韻

物望羣瞻進退間先生風度杳難攀
神仙骨勝留侯健帷幄功高李泌還
却眺白雲懷子舍長憑金鏡駐恩顏

鮑照詩孤景留恩顏

君臣名分家人誼禮絕平時供奉班

承明出入兩周星紫炁遙瞻傍九靈
一代龍門示模楷同時虎觀奉儀型
賞留瓊島看花宴道在青箱授几銘
連日宣傳尤絡繹

天潢舊學重傳經

家書天上喜開函，無恙春風報布帆。人以新陰艷桃李，天

教晚節護松杉。一門四世皆餘慶，

時遇單恩正一品官在任者例得貤封四代

公方養母乞歸得邀恩例實異數也

八座三年特改銜，去住到公真綽綽。

主恩前後總非凡。

西苑門東並歌鞍，自聞高唱和皆難。疎簾捲雨吟紅藥，

畫閣傳香賦牡丹。

以上皆記同直西苑事

一字褒增華袞重，萬間

廣被布衣寒江湖，不放滔滔下有力。能迴既倒瀾，

丹梯百級上

丹墀獨藉文章結

主知去國光陰移綠鬢向陽花木發華滋

奎章再錫歸裝富

優詔頻頒飲餞遲此意旁觀猶感涕那教身受不生悲

曾聽邸舍話

金鑾敢望天衢振羽翰門外忝隨新立鵲巢痕猶認舊

棲鸞

恩濃晝日看三接夢繞鄉園感百端
直擬臨歧論後約好收朝跡共追歡

四月二十三日

分賜西苑入直諸臣

御書扇臣慎行得

聖製泊舟惠山詩恭紀八韻

珍重傳宮扇輝煌徧直廬

賜當清景下頌及午風餘應候知
開闔無塵待掃除未

秋涼已襲纔夏暑先驅

駐蹕留佳咏分行灑

御書恍疑泉到耳真覺翠浮裾墨氣生濃淡煙光動卷

舒終身懷袖裏長似拜

恩初

謝

賜玻瓈眼鏡二首

五月初一日

玉比晶瑩鏡比圓一時披豁覩青天明珠吐暈泥沙外

燭火分光日月邊
名紙尚堪題細字
秘書仍許對新篇
此生視息真何幸
雙眼摩挲敵少年

霽月光風在

紫垣海西佳製

賜頻煩

漢書注鄭重
猶言頻煩也

潭空秋水清無底
壺貯春冰薄有

痕絕勝金甌除
肥膜不須藜杖照
黃昏曾經隔霧看
花後老戀餘光盡

主恩

端午日西苑

賜饌恭紀

天上天中節初晴景物鮮榴含將放蕊葉擁未開蓮菰

黍縈宮綫

先一日賜稜

蒲觴撤

御筵

恩波真不淺長傍鳳池邊

賦得夢破蓬窗雨

奉 睿旨不用應制體

明燈初施酒微消倦枕扁舟夜次寥楓葉橋邊看漠漠

蘆花風外聽蕭蕭一天雲氣沉孤雁兩岸灘聲長暗潮
喚醒江湖十年夢起尋歸路尚迢遙

題少宗伯孫樹峯前輩扇頭榴花

丹砂染出鶴頭紅畫稿移來禁苑中似與天工諧暖律
年年開候應薰風

王麓臺前輩為余畫扇自題其後索同直諸君和
萬樹鳴蟬水一隈西山驟雨過輕雷看君老筆如并剪
割取浮嵐暖翠來

潞水歸帆圖為諭德姪賦

日長如年暑未徂
丁丁晝漏傳宮壺
直廬直伴一事無
開卷示我歸帆圖
三竿秋水六幅蒲
小船放溜如飛鳬
浪花遠吞丁字沽
綠楊拂岸交紅芙
舟中之人疑可呼
掉頭徑欲歸來乎

君恩未許賦遂初
田園有路去尚紆
作詩聊取償宿逋
勸爾且勿思葦蘆

瀚海石歌奉

肯作

瀚海出國門亭堠萬有餘

君王神武勤遠馭伐叛特欲安邊隅歸來玉斧畫大渡
屬國東西一都護羈縻不設甌脫閒何者能邀

至尊顧異哉有神物產自此海濱遠從開闢混疆礫直
到海底今揚塵女媧補天煉五色散落人間人不識年
深道遠莫致之瓌寶仍為天上得

禁林過雨山蒼然綠窗窈窕生紫煙越羅蜀錦開什襲

詔許重陳玉案前內官捧下

通明殿耀眼平生驚未見碧砮奇氣蓄風雲銅鏃飛芒
繞雷電七星挂斗何煌煌六十四象隨圓方綺霞縠霧
錯采章白壁自白黃琮黃或如荔垂枝又如榴拆囊或
如鏡留影又如芝植房或如犧牛角繭栗或如蝦蟇入
月領頤張或如青螺或紋蛤或如馬肝止血瘻膏盲或
如珊瑚出網丹出鼎松脂出地琥珀凝堅光賦形寓色
靡不肖化工之巧盡洩無留藏臣聞積水類生石瑟瑟

波搖紅韎鞬潮淘汐戰廉角平蜃吸鰲喙光怪發黔中

白鷺洲

貴州思南府有白鷺洲文石絕佳

文登彈子窩

在登州蓬萊閣下海中見蘇軾

集

偶披千萬遇什一毓秀孕靈能幾何孰如此石來自

遐荒外磊砢英多殊可愛攜來共指前席珍采處曾蒙
後車載石兮石兮汝豈無知空抱質顧盼

思深同剪拂回思萬古委泥沙方信

聖朝無棄物

寄祝汪韋齋年伯七十壽時官鞏昌郡丞

宦跡中經四郡移姓名曾達

九重知神仙路指青牛道風月吟寬皓首期愛酒每傾

鸚鵡盞生兒多集鳳皇池

謂武曹文升昆季

頭銜特為

貤封換歷守還

朝算未遲

奉

旨免赴教習廳賦呈院長揆公

第二廳前逐隊過北扉咫尺接鑾坡

詔恩已免春秋課館職猶充弟子科

顏魯公詩魯國今從弟子科 變

白果能生黑否


少陵詩余髮喜却變白間生黑絲

出藍其奈謝青何北史

李謚傳初師博士孔璠後璠還就謚請業同門生語云青出藍藍謝青師何常在明經

回思東閣

傳經地老廁門牆媿自多



敬業堂詩集卷二十九

欽定四庫全書

集部

敬業堂詩集卷三十

詳校官左中允臣瑋五珠

助教臣常循覆勘

總校官庶吉士臣倉聖脉

校對官中書臣雷純

謄錄監生臣蔣厚傳

欽定四庫全書

敬業堂詩集卷三十

翰林院編修查慎行撰

隨輦集

起癸未五月
抄盡十二月

元時避暑灤京百官皆有公署今惟詞臣數人耳

癸未五月

大駕將幸山莊先日傳

旨南書房翰林六人俱著隨行六人者諭德臣昇編修

臣廷儀臣名世庶吉士臣灝臣慎行臣廷錫也臣

壯履自請隨班亦預焉始而行宮檢書既而圍場
觀獵往返計百二十日每有所作輒呈

御覽附以入冬後詩共為一卷

將隨

駕往口外避暑蒙

恩賜紗葛衣二襲恭紀

垂柳陰中畫卷幃微軀宜稱襲

恩輝行穿碧水丹山路先

賜含風疊雪衣

杜甫端午賜衣詩細葛含風軟香羅疊雪輕

涼逐冰絲分繭

館香隨葛越出星機序更不用愁刀尺預算秋深扃

踽踽

五月二十五日隨

駕發暢春苑晚至湯山馬上口占四首

雨餘沙磧淨無泥
瓜蔓秧針綠滿畦
共識

君王愛民意
村村駐輦看扶犁

閒按輿圖考地名承平畿甸古長城

昌平山水記長城
齊天保二年所築

詞臣頻日承宣喚

特許班隨豹尾行

軍裝小隊走弓刀年少曾親鞍馬勞老去承

恩還自媿重蒙

天上賜征袍

炎景當空日正長潺潺湯峪水如湯泉源萬斛皆天澤

化作人間六月涼

是日赴東宮召觀灑睿筆口授書法兼蒙

賜扇恭紀十六韻

天縱儲君聖英資曠古奇毓成龍鳳德學本帝王師
几硯無他玩宮庭備幼儀就將猶勉勉敦敏倍孜孜
鶴禁時多暇

鑾輿出每隨幾曾疎筆墨直是好文辭義畫傳家法堯
章煥丕基書多呈

御覽恩許侍臨池訣發千秋秘工兼八法宜銀鈎光

絢爛金璫象紛披腕力由神運心源絕仰窺難窮惟贊
嘆過望是榮施寶簪承華重仁風被物慈述書徒續
賦應教愧成詩朝爽襟先挹秋涼袖早知驪珠長在
握

宸翰並昭垂

一月前蒙
上頒賜御書扇

皇

賦得綠樹陰濃夏日長

二十六日
講官題臣亦擬作御試

高倚層霄俯映池綠陰陰處日遲遲晴穿密葉蟬初翳
暑薄交柯鳥未知曲徑煙分蒼蘚潤重樓人靜畫簾垂

炎曦只隔深林外似戀清幽不肯移

二十七日隨

駕發湯山

涼殿東來御路平金輿八襲正徐行雲從萬疊峰頭出
風逐千羣馬尾生甘澤祇應歌盛世醴泉何用草新銘
抽毫進牘慚臣職納鉢親隨第二程

懷柔道中遇雨是日

駐蹕密雲

七渡河邊過綵旂坡坨高下入檀州午陰側帽消朱夏

細雨垂鞭似早秋地險一軍資障塞

開元要畧云密雲燕之邊陲管障塞

千軍五時清三輔奉

宸遊庠

音提

奚父老爭扶杖隔歲重攀

翠輦留

方輿紀要後漢曰隗奚魏皇始二年置密雲縣治提攜城臣按續通典檀州密雲縣即漢庠奚

縣舊治隗奚與庠奚音本相同魏書遂諱為提攜當以漢書為證

賜觀

御書大學經傳恭紀二十韻

昭代文明啓吾

皇政化隆熟精洙泗理大闡聖賢功胞與周民物幾康
謚始終一經神默契十傳語全融堯典推明德湯盤視
被躬孝慈為世則好惡與人同異說歸

淵鑒羣儒仰折衷欲令聲振鐸端賴筆抒虹心法由誠
正書源本貫通學難窮秘笈勤不輟行宮滌硯龍窺沼
揮毫鳳舞空淋漓雲氣外披拂柳陰中星斗天垂象山
泉

帝發蒙教傳先

胄子

前一日書成先賜東宮展閱

寵示逮臣工偏

黨消皇極維持長士風頌應徧豐序澤自被西東

睿藻光何煥

王言義必充

卷終有御製跋語

道宏該創守力厚闢鴻濛義畫

傳同遠箕疇演並崇煌煌治平業萬古照蒼穹

登密雲城樓

第一封畿此要衝兩城宛轉合長墉風生溫谷油油黍

黍谷在懷柔密雲二縣界

漲走潮河矯矯龍井底炊烟沈石匣天西

積雪射居庸

志稱居庸為冷關
積雪盛夏不消

八荒戶闥今同視笑說

秦關百二重

石匣營

已廢金溝館猶存石匣營濛濛空翠裏細雨濕霓旌

恩許扈

蹕諸臣戴草笠

臺笠都人制黃冠野服姿直疑雲覆頂不怕雨催詩涼
燠俄能換陰晴兩自宜從臣齊戴德美陰荷

皇慈

過南天門初見邊牆明徐武寧所劄減少保重
修者也

勝國留遺築危梯極望收萬峰乘障起一水入關流形
勢當全盛邊牆免歲修太平輸鎮將裘帶取封侯

柳林喜雨呈同僚

高柳垂陰漸近關

地在古北口南三里

炎蒸疑在有無間解衣脫

帽

君恩重下馬分題客況閒枕底雷生南澗雨城頭雲起
別州山朝來擬草甘霖頌才短羞隨供奉班

六月初四日扈

駕出古北口

太行蜿蜒二千里七十二圻連首尾東趨遼碣西冷陁

留幹一門屹中壘

古北口一名留幹嶺見金史

巨靈劈手石如壁雲雲

根俯插黃花軍烟氛突過掃無迹風雨欲來天半聞出

關彌望神州壤

六飛清暑頻來往高壩已斷山不斷無數芙蓉列仙掌

川迴岡轉輦路長涼亭舊驛今村莊

元時避暑沿路多涼亭賜東西涼亭

軍士糧鈔見文宗本紀帝獵北涼亭見趙世延傳明洪武二十七年置古北口十四驛猶存東涼亭驛之名

禽魚共識

天顏喜草木中含

御氣香小臣多年客燕代夢想何曾踰紫塞自詡遭逢
老更奇停鞭飲馬長城外

塞外山

已被雲遮百萬層
又從雲外見
峻嶒翻綠山
好添惆悵
未得峰峰策杖登

兩間房直廬作

隨班番直又晨興
金鑰銜魚轉數層
延閣日長無箇事
坐消清簟一壺冰

初六日奉

旨編輯歷代咏物詩恭紀四首

宣文小閣秘書

延閣圖書取次陳元周
伯琦咏宣文閣詩句

雲霧牕中點

甚初

聖主不曾遺小物莫輕爾雅注蟲魚

儷白駢青句已陳篇章何處發清新盡攜中秘隨行笈
三篋何煩默記人

日日珍羞出大官雉羹魚鱉水精盤丹鉛未是酬知地
聊與風人解伐檀

曾披圖籍考山川

聖訓真同象緯懸文選樓高重拜命敢同輕薄議前賢

初伏日 睿賜時果木瓜酒恭紀

帳殿爐烟合周廬霽景長
人間正初伏塞外已新涼
珍果當筵 賜芳醪洗盞嘗
恩波承少海一勺詎能量

行過青石梁

天豁新開嶺鸞旗曉向東
古藤攀石度絕壁過雲通
鳥啄槐花雨蟬嘶櫟葉風
林巒行不盡長在畫圖中

駐蹕鞍子嶺連雨驟涼

複磴中涵金碧姿
小青山下蹕初移
愛迎嵐翠晨趨直

貪傍燈明夜咏詩
泉脉曲通行帳外
雨聲渾似滴蓬時
水晶宮殿清涼國
傳語人間總未知

賦夜光木

積水生神木
俄登几案旁
四時無改火
五夜必騰光
近映藜輝淡
遙分桂魄涼
頓教虛室白
臨卷勝螢囊

御賜武彞芽茶恭紀

慢亭峰下御園旁

武彞山下有御茶園
元時貢茶地名

貢入春山採焙鄉

曾向溪邊尋粟粒

蘇軾句
武夷溪邊粟粒芽

却從行在賜頭綱
雲蒸

雨潤成仙品
器潔泉清發
異香珍重封
題報京洛可
知消渴賴瓊漿

連日

恩賜鮮魚恭紀

銀鬣金鱗照坐隅
烹鮮連日

賜行廚感踰學士蓬池鱠

唐時學士賜食蓬池鮮鱠

味壓詩人丙穴

腴

元虞集詩魚藏丙穴腴

素食餘慚留匕箸
加餐遠信慰江湖
笠

簷蓑袂平生夢
臣本烟波一釣徒

陸龜蒙詩笠簷蓑袂有殘聲

送勵南湖前輩奉

旨歸省尊甫少司寇公病

橐筆經時共直廬何堪絕塞唱驪駒乍看請急情辭苦
特許還家

恩遇殊客夢不離丹嶂遠鄉心已與白雲俱最憐一掬
酬恩淚并為思親灑路隅

塞外蝴蝶

應東
宮令

羅浮仙種幾時來金粉天生不染埃忽見一雙同照影

始知隔水有花開

十六日五更隨

駕發鞍子嶺行至三道梁天始明

金壺虬箭響登登霽月流天景漸澄谷罨一重環翠幙
雲移雙仗識紅燈風輪暗激飛梁轉松頂遲看旭日升
滿篋纖絺長什襲此來何處有煩蒸

十八日

駕幸釣臺召臣等隨行

賜膳釣魚恭紀七言絕句八首

挿天碧嶂起芙蓉
路轉潺潺又幾重
百頃風潭雷雨過
萬魚銜尾候

真龍

高臺俯瞰樺榆溝
指示灤河最上流
記得銀絲鱸鮮鯽

欣從塞外識源頭

已刻上御樓召臣等五人至臺下指臺下流水諭曰此灤河上流也

魚藻池邊

輦路平直隨仙仗
到達瀛官廚初飫紅蓮飯

御饌仍分碧澗羹

午刻賜御饌紅蓮米飯柳根魚羹

芳餌循環下釣筒絲綰長日侍青宮烟蓑雨笠尋常

句慚愧猶蒙記憶中

午後奉旨翰林諸臣赴皇太子行帳釣魚臣前謝賜魚詩有臣

本烟波一釣徒之句東宮舉以示近侍并記以志愧

山莊一帶並河壩人衆如魚盡力田要與周詩占吉夢

早開場圃待豐年

一條羅帶水拖藍只少漁舟著兩三滿眼丹青輸畫手

鶯聲柳色侶江南

文鱗躍處起漣漪水族沾

恩感聖時不是網罟施不得為留餘澤及鯢鯢

佳名原自柳根來

魚名柳根赤蓋柳根之色赤此魚好噉柳根故名

釣得仍將

柳貫鰓分賜詞臣三百尾揷竿騎馬雨中回

賦得遠色有諸嶺限二蕭

應宮令東

誰寫丹青向碧霄參差入望勢偏遙烟光澹處疑無樹
日氣生時似湧潮飛鳥不能踰嶂外橫雲只許抹山腰
分明有路行難到知隔天台第幾橋

二十日

行殿召對出至直廬內侍復傳

諭

臣

慎行云汝子在東鹿縣居官甚清朕已稔知感

恩述事恭紀二首

已注金閨籍仍叨顧問榮

睿容瞻肅穆

天語聽分明轉益臣心懼難窺

聖學精行宮清秘地不異侍延英

穉子慚民社能忘舐犢私未成期月治驚荷

九重知清白原家法生成仰

聖慈家書連夜發矢報勉捐糜

恭和

御製立秋喜霽

聖主如天惠澤周與民同樂每先憂歸雲夜散簷頭雨
沃土人畊化外州野鶴報晴初夏夏良苗入望已油油
詩成共識

皇情豫白藏新占歲有秋

恩賜佛手柑恭紀

筠籠珍重貢炎方
羅帕玲瓏照玉堂
縹蒂經時猶帶綠
芳苞映日已全黃
長隨錦荔迎涼到
遠勝新橙透甲香
別與傳柑增掌故
立秋時節

賜山莊

磁瓶草花

澗草巖花摘小叢
秘磁斟水愛青紅
不教開落塵沙畔

只似栽培雨露中
映壁數枝開曉日
入簾雙蝶帶西風
誰將蟋蟀離邊景
移向灤河避暑宮

秋海棠

小紅低映綠窻紗
昨歲開時正別家
白髮滿頭還自笑
塞山六月看秋花

奉和

御製穹覽寺七言絕句敬次

上韻二首

清磬和泉隔岸聞
蒼松翠蘂散氤氲
不知四面山重數
遙指爐烟是碧雲

寶翰留題昔未聞
麝煤龍餅氣氤氲
祝釐老監今頭白
特起香臺貯彩雲

陳潛齋前輩分餉柿子酒

小榼遙看走馬軍
微風先為送奇芬
行廚洗盞湯初老
隔幔呼燈日漸曛
尚想青黃垂野徑
忽驚紅綠眩微醺
東坡詩醉眼眈紅綠
從今細雨殘更後
每到醒時定憶君

七月初五日

賜食蜜漬荔枝二首

嶺外未曾嘗小綠閩南猶記擘輕紅

石屏詩新來嘗小綠少陵詩輕紅擘

荔枝而今拜賜來天上他日嘗新歎轉蓬

蠟封蜜漬味全融秋暑初迴却扇風領取一襟冰雪意
白銀盤映荔枝紅

蒙古貢馬

蒲梢不拒諸蕃貢印烙新加毛骨殊斂却霜蹄行駕鼓

爛如雲錦看成圖
駟駝廐應房星上
首宿園開瀚海隅
不比無羊歌
考牧聖朝馬政在攻駒

七夕喀喇火屯雨後作

雕霧鷹風漲沈寥
一天秋意頓蕭蕭
彩虹截斷遼西雨
飛入銀河當鵲橋

賦野杏根

古根埋不爛
搜剔豈能辭
斑剝舊苔蘚
槎牙新菌芝
乾坤無棄物
斫席得奇姿
自有天然質
何煩斧鑿為

裕親王挽詩二首

奉
旨作

禮絕三公上親為

萬乘兄分忘敦棣萼邸賜備哀榮傍邸愁雲結

回鑾淚雨傾

時上駐蹕塞外聞王訃即日回都哭臨

桐陰留畫像存歿感

皇情

上常命畫工寫御容與王並坐桐陰下蓋取同老之義平居友愛如此

尚覺春秋富俄驚泉路長友于歸

聖主文獻失賢王海濶星沈象天空雁斷行舉朝哀挽

切感動為

宸章

雙塔峰歌

灤河之水鳴淙淙晨光欲透草木翁千巖浮動萬壑充
十里霧濕三花髮陽烏展翅烟攄虹倒射石壁紛青紅
中有兩峰迥不同向人騰躍比祝融厥初生時誰所鑿
分而為二疑靈窿自從巨斧開鴻濛勢欲復合難彌縫
小者為霍大者宮前高後亞兒隨翁其顛石笋各卓空
如窳堵波劇圓穹其旁老松垂薤葱雨露已費千年功

初從南麓瞻崇隆恍然御氣乘罡風青天一碧懸雙蓬
仙舟出沒波濤洪形隨徑轉日在東併作高柱孤巒崢
首末稍斂中微豐異哉三竅何玲瓏下空一門拆崆峒
中央一綫星光通最上一穴磨青銅團團皎月非朦朧
洞貫腹背豈羿弓誰與人力爭天工須臾位置移忽忽
左右互易驚愚蒙漸行漸遠漸不窮回頭依舊藏靈竅
我思佛力大且雄舍利所在塔廟崇十方照耀開盲聾
僧伽興廢會有終豈如茲山婉華嵩巍我俯闢荆榛叢

綿亘古塞接蟪蛄劫火不壞況兵戎地雖僻左秀獨衷
昔名未彰今始蒙吾

皇盛德邁帝鴻盡攝六合歸牢籠年年雅詩賦車攻山
莊近在封域中已獲顧盼邀

重瞳何須秩祀偕三公小臣作歌達

聖聰特與此石慶遭逢

塞田雙穗嘉穀恭紀

屬車到處瑞徵奇嘉穀

俗呼小米子

欣看燕尾垂異畝比禾

皆九穗連畦如麥總雙歧澤流膏雨珠兼玉譜入豳風
畫亦詩從此康年豈勝紀太平

天子是農師

將酉君為汪紫滄畫菜索題

君昔養親惟小園白菰紫芥供晨昏君今已食大官餼
夢寐何曾忘此味秋來見菜應思鄉將家三徑吾求羊
玉堂雲霧看落筆中有故畦風露香

二十七日發熱河

耿耿疎星曉泠泠白露秋

是日白露節

老松經燒斷頑石隘

溪流草苔沿籬屋人騎渡水牛塞田霜氣晚七月已全

收

曩時塞外六月已寒黍稷少熟今年七月杪尚未作霜故莊田倍收

八月初六日發唐山營初入蒙古界

興桓左界接遼陽千里中開雉兔場邊戶生涯資射獵
天家甌脫變畊桑風馳屬國東西尉化被諸蕃部落王
豐草長林皆禁蘄遙看直北是龍荒

度汗鉢木兒嶺

一林槲葉一林楓半染青黃半染紅只道平沙隨地濶
忽開絕境與天通冰霜氣候陽和裏金碧山川指顧中
緩轡不知林壑險殊榮孰與六人同

嶺路險仄特命侍衛導臣等前行

初十日發擺波喀口

寒色馬殘疏重裘怯不勝嚴霜如薄雪細水作輕冰
蕃部三千帳圍場百萬層遙看射生處旭日正東升

十一日

駐蹕巴林桑斯臺

上於附近山中行園

賜臣等全鹿一隻恭紀

雉尾雞翹曉望分旌旗高捲萬山雲威加草木秋行令
禮重羴腰畫掩羣從獸總歸司馬法

回鑣如策凱旋勳只慚未効三驅力拜

賜長先七校軍

額勒蘇臺間雁有懷德尹時聞弟乞假將出都
一聲哀響落秋旻列幕燈明夜向分倦枕何人還不寐

望鄉有客最先聞路長遼海霜前月天偏陰方雪後雲
附爾封書須早達人間兄弟有離羣

十二日

駕幸額勒蘇臺大獵

召臣等觀圍恭紀七言長歌一首

聖朝雄畧彌宇宙四海為家同在宥行宮直過大青山
繼武年年寓巡守川原蕃廩少甌脫邊障清寧罷烽堠
盡收種落當郊圻大展岡巒作靈囿涼秋八月商飈發

霜氣凝嚴冰未溜朝來下

詔大合圍草淺林疎宜往狩三千虎旅移前帳十萬龍
驤出華殿奇毛箇箇五花文表貉揚殪徧巖岫層層葉
幄絢紅紫面面山屏圍錦繡前行十里雪初晴千步場
如築新就遙看數騎林西麓畫裏依微人比豆雁行齒
序列後先魚貫班聯隨長幼綿綿翼翼遠不斷整整斜
斜近相湊須臾旋繞山之東觀者同時盡回首舉鞭初
可一二數錯落星文排列宿長松冠嶺嶺插空人馬從

空俄下走呼聲幾處震虛谷驚起雕翎落飛狄此時已
有鹿斯奔闌入圍場孤引肱東跳西顧迷所向首鼠張
皇等鼯鼯魚麗鵲翼頃刻成變幻圓方詎能究陣圖本
是丘井法旌立和門嚴介冑合圍漸緊壤漸平匝布叢
攢勢相繆不知鹿羣何處來俟俟儻儻紛邂逅磨磨聲
麝麝麝麝麝麝麝麝麝麝希間偵伺前復却防內恇
惶駭而驟渴舌長如飲澗垂野心思突重圍透

天威奮武臨咫尺頓轡齊鑣不容竇神機獨握舉大綏

衆志成城鹿為鏃虹流電掣忽飛鞚月滿弓開胥入彀
逸足公然帶箭馳先聲所至隨弦仆

一人獲雋萬人歡羣祝

君王千萬壽大弔旋鞭不盡發餘勇猶浮

袞龍袖網開一面頌

皇慈節應騶虞叶仁獸雲收霧捲圍乍撤萬騎如風散
晴晝小試真同掃塞氛盈庖豈獨充飴餽觀兵耀德典
彌崇行賞班餘功孰慙竊聞上古有大甸秋獮相傳本

由舊青丘自欲吞雲夢吉日先須卜庚戌漆沮甫草偶
于畋悉率從王惟左右今之健兒千三百來自諸蕃踰
尉候大圍共一千三百人皆出蒙古喀爾沁與諸部落期門將士但旁觀山立
何曾技輕奏此皆

至尊善撫馭同軌歸誠車輻輳

國家恩澤浩如天蕃部寧非天所覆自然忭舞羣用命
王用三駟此其又車攻寧數小雅材羽獵應喚西漢陋
矢詩索筆本臣職況著征衣隨短後雖慚無力効交鋌

盛事千秋幸親覲

中秋節

恩賜月餅時果恭紀

列幕周廬白似銀中天夜氣肅鉤陳

皇衷尚感團圞節

時因裕親王未
卜葬停止筵宴

禮賜偏優侍從臣宮

餅堆盤隨月彩御園分果得時珍回思瓜豆田園味老

去驚看節物新

是夜角火羅對月呈掌院揆公時奉使朝鮮初

還

年年別裏逢佳節，今夕班荆又一奇。
玉兔銀蟾新

賜餅

是夕御賜大小月餅皆飾金彩宮殿為蟾兔之形

錦囊珠笈舊題詩，烏桓

露警三更夢，碧海槎回八月期。
記取勒蘇山下路，霜花壓帳話高麗。

十六夜撒勒巴爾吉對月

十分月到今宵滿，一半秋從昨日過。

前一日秋分

路轉溪山

鳴鼓角天垂障塞，繞星河不愁織女機。
絲濕自笑姮娥

白髮多殘醉易醒宮漏永青綾無寐欲如何

十九日度生吉兔嶺

翠屏丹嶂四成圍見說前岡雉兔肥山下忽逢沮洳水
蘆花如雪馬頭飛

二十五日曉發舒庫里口

曠曠初日上天東一片秋光照耀同好是萬株紅葉滿
已經霜後未經風

二十六日扈

蹕至興安嶺有

旨命臣等登絕頂遠眺恭紀七律四首

崇岡斗起杳難攀
翠罕華旌歲往還
六合一家寧恃險
九邊三面總無關
龍沙展勢提封外
鳥道盤空霄漢間
詔許重登峰頂望
始知高出萬層山

忽開眼界向層巔
指掌圖成立馬前
東走陪京山委浪
北踰瀚海地黏天
牛羊白散千屯雪
草木青回萬竈烟
四十九藩齊望幸
呼嵩聲徹半空傳

甲帳辰旗紫邏長極天晴色辨微茫黃榆不斷庭方路
白日能消冰雪光獵騎嘶風爭北向野鷹隨雁亦南翔
西山蒼靄遙相接直似登臨在帝鄉

輿圖遠闢古興安鳳舞龍迴氣鬱蟠半嶺出雲鋪大漠

喬松落葉倚高寒

嶺以北松
皆落葉

丹青不數東南秀俯仰方

知覆載寬萬里乾坤千里目欣從奇險得奇觀

大風下興安嶺

崇岡無樹朔風寒直下真從井底看知是向南歸路近

亂飛黃葉打征鞍

二十八日

駐蹕伊遜河源

上親射石熊以熊掌

頒賜臣等恭紀長歌

千峰萬峰爭落木
秋聲蕭蕭氣肅肅
連朝續武大掩羣
殪盡山中雪斑鹿
西風卷地餘怒號
虎豹股栗豺狼逃
老熊何物敢自匿
出林獨叫求其曹

天威赫業揚雲罕，搗穴直窮熊所館。公然人立向人啼，
正值玃弓彀初滿。皮毛與石孰比堅，不聞射石石亦穿。
須臾三發三命中，搖尾大似求哀憐。忽看趨捷如猿鳥，
騰上千年松樹杪。神機別以火器攻，霹靂斜飛貫脰腦。
半空拗折青珊瑚，松耶熊耶墮地俱。

皇心因材有生殺，倔强那得逃天誅。雉飛兔走清林莽，
重馬馱來徧行賞。驚性寧非恃爪牙，焚身至竟因蹄掌。
駝蹄鹿尾猩猩唇，舊傳此味配八珍。大庖祇合供

御饌榮施何幸加詞臣臣聞南山之下渭水濱從禽搏
獸空鋪陳賦家漫誇三十六終日射侯原非真豈如吾
皇勇且仁除兇服猛胥躬親已靖六合無纖塵山林兼
使異獸馴他年珥管紀上瑞郊數行見遊麒麟

賜觀紫騮

御馬恭紀十韻

御馬紫騮名牽來左右驚無疆全地道至健配天行出
應房星瑞時逢朔漠清風雲開萬里日月夾雙睛濶步

無谿塹深觀識性情馴良由駕馭神駿本生成往往從
蒐獮悠悠逐旆勢隨龍象蹴氣躡虎狼平按轡千林
肅回鑒六幘晴銜

恩何以報戀

主母長鳴

九月初三日 東宮行園召觀殺虎恭紀

連岡若環斷若玦猛虎一聲蒼石裂千狐百貉走且僵
獨踞巔屹為窟穴 儲君英武如吾

君六鈞親挽古未聞年年侍輦出狩獵手搏奚止什伯
羣餘威所臨氣先壓弓未離囊箭猶插星流一點綠沈
槍刺虎真同捉鵝鴨黑文白額光斑斕毛血映徹朱旗
殷豐扛重馬挾以至衝颶霍霍來陰山羽林奏刀技神
速理解肌分同破竹憐渠故是獸中雄特命留皮瘞其
肉大哉利溥仁人言麟趾原從聖澤論一片文茵常在
御半丘白骨更銜恩臣工侍觀咸動色殺物之中昭
震德不知看射向山南何似隨圍來塞北

初六日隨 東宮射獵蒙 賜全鹿野雉恭紀

十首

周戈豹韃導中央 特許詞臣列兩旁
昨日山中親射虎 近前指與舊圍場

林深谷邃轉坡陀 黃葉聲中掣電過
一箭攔回飛走路 隨身數騎尚嫌多

蒼鹿年深雪作斑 洞胸飲羽突希間
別教羽衛追風逐 天馬如龍又過山

射雉仍開八札弓
離披彩羽墮晴空
欲知官箚長多少
五寸雕翎帶血紅

英姿雄畧似吾

皇連日分圍獵
澗岡赤豹黃羆皆
進御充庖一味不
私嘗

一色明駝倒載來
獵塵收處夕陽開
翠屏萬仞紅雲外
別領旌旗小隊回

重輪長傍紫薇垣
侍輦歸仍侍寢門
每聽雞鳴親視

膳豫遊原不廢晨昏

德備才全左右宜家傳真得

帝王師萬鈞腕力强於弩朝射貔貅夜賦詩

割鮮分肉快何如馬後捎來拜 賜餘今日塞垣親卮

蹕去年京洛正騎驢

平生未習穿楊技老去空存見獵心慚愧書生叨異數

酬 恩無地感 恩深

重九雪後汗鐵木嶺觀獵二首

銀麋縞鹿挺巔岼重展圍場勢更寬十萬羽林齊挾矢
只教六騎作旁觀

毛鱸蘘蠓愛新霜每到登高必望鄉誰料烏桓山外路

萬峰踏雪過重陽

前二日大雪

十二日

上親射金錢豹恭紀十八韻

朔漠回鑾候

君王罷獵時忽聞山下豹正逐草間麋詎縱顏行抗還

將餘勇施三驅爭効命七校復揚旗金鏃霜花淬飛龍
電影追應弦疑樹鵲拔箭已連骹直作摧窮寇真如殪
伏雌右髑充上殺全質少微疵狸首斑斑血猫睛睜睜
眇鬚雄粗縮蝟爪利善藏錐自匿荆榛窟初含霧雨姿
氣曾吞虎兕力肯讓熊羆緩死俄無路偷生詎有期但
令供獮狩猶得壯威儀鎗桿風搖尾鞍橋錦冒皮呈文
留炳蔚取用及捐糜師武當關險兵韜示象奇小臣慚
獻頌何異管中窺

十四日

駕發藍旂營乘舟網魚

命臣等沿河騎隨

賜鮮鯉人各一尾恭紀

雪光晶晶山稜稜千山映雪朝日升灤河之水暖不冰
剡舟剡楫凌空去三丈黃龍

帝親御川后前驅風伯助峽形漸束波愈清潛鱗帖帖
何敢驚人聲不聞聞水聲須臾船重

皇情樂銜尾駢頭來繹絡八紘一張魚載躍鯨鯢鯢
旨且多義不盡取收網羅滿渠新漲餘天波詞臣拜
恩已無算復

賜紅鱗長尺半馬上攜歸萬人看

是日中途

命侍衛射虎復

召臣等同觀恭紀

後殺豹先殺熊陰方凜凜生寒風先殺熊後殺虎積雪

睢睢映強弩

君王威德彌寰宇坐致遐方歌樂土闢田築室藝稷黍
猛獸寧容此偏處爾牙如鋸我鏃鋸焚林湯谷期盡殲
溪東距溪西相望十餘里忽聞變應徹山顛

天語遙傳順風耳

西洋人所製

六飛所幸成坦途冥頑何物乃負嵎期門壯士能手搏
奉令何異天行誅天生

聖人能格物禱祀窮奇情狀悉耳端一缺戕一人厥罪

昭然何待詰自從殺此虎邊牧蓄雞豚自從殺此虎莊
戶長子孫黃熊赤豹同噬吞腥風掃盡無一存小臣稽
眼嗟未見談虎尋常色為變此來快覩三害除直似陪
遊向畿甸

十七日度小青山

去日蕉衫暑雨收歸時急雪灑重裘重經司馬臺南路
紅樹連山正晚秋

入古北口

金支影轉翠微間萬馬驕嘶並入關
雉堞連雲軍角壯
虎牙憑險戍旗閒
西風漸老河邊柳積雪回看塞外山
正是秋清好時節

六龍行狩扈南還

過牛欄山下二首

青山缺處吐孤城
行到牛欄路更平
一片黃榆綠槐影
白狼河畔作秋聲

白酒黃花興未違
一鞭新自塞垣歸
短裘衝過重陽雪

又向京華換袂衣

十月初十早入直蒙

恩賜帶數珠恭紀

星聯珠貫入承明

是日同直
共七人

章服驚叨四品榮一串

牟尼呈五色同時裘飾粲三英循環豈易充臣數祝

聖惟當轉佛名長恐維鴉譏不稱也如老馬錫繁纓

房師汪東山先生請假奉太夫人南還留秋帆

圖卷子命題敬賦四絕句

秋興賦罷賦閒居首路爭看侍板輿此樂季鷹渾未識
區區歸計為鱸魚

一聲天上聽臚傳小住蓬山已四年來與鄉人重換眼
五湖別自有神仙

宦海茫茫詎有涯急流幾箇赴歸期霜前吾谷秋如錦
算是扁舟到岸時

一條清況冷冰銜十幅西風穩布帆公去我留緣底事

擬因苦笋脫朝衫

用黃山谷語

題劉禹峯水邊行樂圖小照二首

風酣綠浪紅蕖雨洗蒼苔碧梧萬口詩傳京洛半生夢
落江湖

菱租舊輸甓社魚計新收白田隔浦三間書屋過橋一
隻畫船

雪後下直口占

徐蹋禁中雪遠看城上山宮鴉巧相背晨出暮飛還

題許有介先生冊子

事出先賢傳名從獨行敦眼看耆舊盡心慕典刑尊逸
品傳書畫餘風付子孫淋漓浮墨汁中有不亡存

賀張志尹前輩生子

鄧藝馮經孰擅場乃翁才藻世無雙祝兒他日無多語
七歲能文似曲江

賦得深屋喜爐溫

幾重簾幙幾重茵深掩紗窗淨少塵
鵲炭燄紅寒漸減
鵲爐灰白煖初勻三冬不納冰霜氣一室能回天地春

應念五更騎馬出銅街已有趨朝人

題元人風雨歸舟圖

遙山澹抹近山遮一棹飄然水一涯似有風聲隨雨到
忽疑雨勢受風斜白蘋洲畔年年客黃葉村邊處處家
身在畫中渾不覺却教人指畫圖誇

十二月初九大雪獨直南書房有懷陝西隨

駕諸君

雲海平鋪鉤砌寬六花如絮點裘乾金猊坐擁玲瓏石

玉蝶爭飛宛轉欄雲護蓬萊長覺曉樹當溫室不知寒
此時最憶隨

鑿客少室中條並轡看

前一日聞
駕已蒞中州

送楊遠卿之任武昌

去年訪君過維揚今年送君向武昌江湖不到塵土眼
遠夢夜落鳬魚鄉洲邊芳草城邊柳騎鶴仙人重出守
洞庭春水際瀟湘大別青山橫沔口烟花三月畫船開
王程不用敝鼓催到官好尋陶庾蹟歷郡正賴龔黃才

才多政簡無不可列戟凝香但安坐閒攜賓從上南樓
倘有新詩應憶我

除夕前一日蒙

恩賜羊鹿雉兔鮮魚鹿尾上尊諸品恭紀二首

山海奇珍鼎味充上尊羅列歲時同斑龍肥羜光相耀
彩羽文鱗澤並豐

頒賜例隨台輔後

自大學士張玉書陳廷敬以下
被賜者凡十三人臣與焉謝

恩多在直廬中一年濫竊官廚饌素食能無愧國風

豐杠錦帕壓重重節假歸沾

湛露濃雕俎味新調翠金玉泉香煖拆黃封鄉風未敢

分僚友

蘇軾餽歲詩亦欲舉鄉風

家祭先應薦祖宗却為思親成感

涕

君羹歸遺

去聲

已無從

敬業堂詩集卷三十